



**Marco Ettisberger
declera pertge
ch'ins duess pro-
mover las fusiuns
da vischnancas.**

FOTO F. ANDRY

Comité retira iniziativa per fusiuns da vischnancas

■ (anr/fa) L'iniziativa «Vischnancas fermas – ferm chantun» lantschada il matg 2011 aveva l'intenziun da reducir il dumber da vischnancas grischunas sin maximalmain 50 vischnancas. Regenza e cussegl grond han refusà l'iniziativa. Da primavaira 2011 ha inoltrà la coaliziun da la ps, d'organisaziuns economicas grischunas e da sindicats cun 4084 vuschs l'iniziativa «Vischnancas fermas – ferm chantun». L'intent da quella era da reducir il dumber da vischnancas per 150 sin maximalmain 50 vischnancas. Durant la sessiun d'avrigl ha decis il cussegl grond sco proponì da la regenza cun 82:20 vuschs e 9 abstenziuns da la vusch da refusar l'iniziativa senza ina cuntraproposta directa. «Al cumenzament da matg ha decis il comité d'iniziativa unanimamain da retrair l'iniziativa», ha ditg Peter Peyer, deputà al cussegl grond (ps, Trin) e secretari da sindicat, mardi a Cuira a chaschun d'ina orientaziun dals meds da massa. Ensemen cun Hans Geisseler, deputà ed anteriur president dal cussegl grond (pcd, Vaz Sut), e cun Marco Ettisberger, secretari da la Chombra da commerzi e federaziun dals patruns dal Grischun, ha el declerà ils motivs per quest agir.

«Periclità las refurmas actualas en chantun»

Cun actualmain 147 vischnancas, 39 circuls, 11 districts e passa 400 corporaziuns da vischnancas è il Grischun a l'avis dals trais commembers dal comité d'iniziativa surstructurà. «La finamira da l'iniziativa e da la politica chantunala è la medema, ins vul sa concentrar sin trais levels, chantun, nivel mesaun e vischnancas», ha ditg Geisseler, «mo davart la me-

toda co simplifitgar questas structures datti differentas opiniuns.» Entant che la regenza e la maioritad dal parlament chantunal proponan per las fusiuns da vischnancas il principi da sutensi, senza sforz, aveva l'iniziativa l'intenziun d'introducir il principi da surengiu: Sche necessari avessan ins pudì sfurzar vischnancas da fusiunar. «Sco tar il cussegl grond che ha refusà noss'iniziativa fiss stà il privel grond ch'er il pievel avess ditg na a quella», ha ditg Peyer. Quai fiss stà tenor el in privel per las refurmas actualas.

«Refurmas sin buna via»

In na a l'iniziativa fiss vegnì interpretà a l'avis da Peyer, Geisseler ed Ettisberger cun gronda probabilitad sco in na fundamental a tut las fusiuns da vischnancas. «Quai fiss stà cuntraproductiv», ha ditg Peyer, «uss, che las refurmas actualas da vischnancas e dal territori èn sin buna via.» Dapi l'onn 1998 hai dà 25 fusiuns da vischnancas gia realisadas u decisas, sco en il cas da Glion plus. «En quests onns s'ha reduci il dumber da vischnancas da 212 sin, per il 1. schaner 2014, 146 vischnancas», ha cuntinuà Geisseler, «era sch'il princip da sutensi cuntegna il privel che fusiuns vegnian refusadas è quai stà il cas fin uss mo quatter giadas, en il Surses, Ziràn-Mantogna da Schons, Breil e Zernez.» La refurma territoriala currenta, la refurma da vischnancas decisa e la revisiun da l'egualisaziun da finanzas intercomunala garanteschon sco che Ettisberger ha ditg ch'il process per simplifitgar las structures chantunales cuntinueschia, «uss èsi mo d'abolir consequentamain tut quai che pudess impedir ulteriuras fusiuns da vischnancas.»